



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

29. Kalenderwoche – ab 23. Juli 2011

De Siddy muss frei bleim!

Nee, unsre Schdadtvähdor - was die immor fiehr scheene Ideen ham, wie se mähr Geld ins Schdadtsäggl neingrischn kenn... - da kannsde bloß schdaun! Hundeschdeuorn, Blidzor, Barkgebiehrn... - da mussde ja ershdema droff komm!

Eischendlich dud misch wundorn, dass die noch nisch off die Idee gekomm sin, Maudgebiehrn fiehr de Benudzung innorschdädtischor Schdraßn zu gassiern. Odor wenischdens Figneddn!

Nascha, wensde die einkoofswillischn Leide, die aus dor Umgähbung nach Gemnidz schdreemen dun... wens de die aus dor Siddy rausaldn dun willsd, da mussde harde Maßnahm ergreifn! Die Derflor sin zähe! Die dun nisch so schnell offgähm!

Isch meene, das is ja ooch wischdisch, dass mor die Derflor e bißl off Disdanz haldn dun. Wenn die alle in dor Siddy rumladschn dädn... un in de Gasdschdäddn rumhoggn dädn... un de Lädn un Geschäfte lährkoofn dädn... - mor darf sich das gahr nisch vorschdeln, wenn rischdisch Lähm in dor Siddy sein däde! Nee, das däde doch... - nur noch Gewimmel! Das däde das Ende dor Friedhofsruhe sein!

Guhd, es sin schon einische Erfolsche erzielt wordn in de ledzdn Jahre. Es dud schon viele Brovinzlor gähm, die nisch mähr versuchn, nach Gemnidz bis in de Siddy vorzudring... - das sin die, die ooch e bißl geizisch sin un nisch gerne Barkgebiehrn zahln dun. Die bleim gleisch so am Schdadtrand in de Einkoofszendren häng, wos Barkn nischd kosdn dud. Dord fiehln die sisch wohl!

Dord dun die dann ihr Geld ausgähm, als wie wennse zuviel dadervon ham dädn. Ja, die sin so, die aus dor Umgähbung heranschdreem dun! Gesindl! Keene Barkgebiehrn zahln, abor koofn!

Nee, isch darf mir nisch vorschdeln, was bassiern däde, wenn die in dor Sidy kosdnlos barkn kenndn... - so wie in Reehrsdorf odor im Neefebark odor... - wie ehm ieborall rings um de Sidy! De Sidy däde bladzn! Die Dörflor dädn gladd alles vorschdobbn!

Nee, bloß guhd, dass unsre Schdadtvähdor so offbassn dun off de Sidy. Da is jedzde de Erheehung von de Barkgebiehrn in dor Sidy werglisch widdor eene begrießenswerde Maßnahme. Un se dud ooch grade reschdzeitisch komm, wo doch de Sidy schon fasd e bißl addraggdief gewordn is!

Nee, abor wo die im Radhaus immor die scheen Ideen hährnem dun... - Hud ab! Meine Gudste sachd allordings - ohne Hud dädn die völlisch kobblos sein.

Eduard Sachsenmeyer